

Reconocimiento di Cas di Papiamento pa Ramon Todd Dandaré Mag.Ling.



Diasabra dia 19 di october Cas di Papiamento a tene un atardi special dedica na Sr. Ramon Todd Dandaré. Ramon a bishita Riohacha, La Guajira, Colombia dos biaha den e ultimo tempo aki, na mei y na september. E dos biahenan aki tabata sumamente exitoso.

Durante e atardi aki Ramon a haya e oportunidad pa comparti cu un audiencia hopi interesa loke el a experencia durante e dos bishitanan ey. Emocionante durante Ramon su presentacion tabata ora el a splica e balor di tur e reconocementonan cu el a ricibi na su pais natal di diferente instancia importante.

E instancianan ta Asamblea Departamental de la Guajira, Consejo Distrital di Riohacha, Alcaldía Distrital de Riohacha Fundación, Teatro Aurora de Riohacha, Fundación Compartamos la Felicidad y Asociación Kojutajirawaa. Di Asamblea Departamental de la Guajira Ramon a ricibi di diputado Daniel Ceballos e maximo condecoracion Medalla Luis A. Robles Suarez. Di e manera aki La Guajira ta reconoce publicamente Ramon su meritonan destacante y e trabou briyante cu el a desplega como investigador, academico, docente, conferencista y gestor cultural di Gran Caribe.

Tur persona cu a haci acto di presencia diasabra a keda impresionada cu e presentacion aki!

Ramon a keda masha contento cu e oportunidad aki pa por a comparti su experencia cu su famia y tur presente.

Cas di Papiamento tambe a sorprende Ramon cu un bunita plakkaat. Ramon sigur merece tur merito y reconocimiento pa a lucha incansablemente pa nos idioma materno Papiamento cu mester haya e lugha cu e merece den nos comunidad y den enseñansa!

Ramon mes no tin Papiamento como idioma mater-



no, pero su amor y su respet pa nos idioma desde edad di nueve aña ora el a bin biba na Aruba a haci cu Ramon a dedica y ta sigui dedica gran parti di su tempo na nos idioma!

Ramon di su parti a expresa su gradicimento sincero y profundo na Swinda y Jay pa a organisa e atardi/anochi inolvidabel aki p'e na Cas di

Papiamento y pa a otorg'e e bunita reconocimiento, na Joyce pa tanto cos cu el a haci p'e y cu hunto cu Mientje a percura pa un bunita bouquet y na e audiencia presente, su studiantenan, su coleganan, su amigonan y su yiu, su sub-rino y su rumannan: "Boso tur a haci di e actividad aki un acontecimiento absolutamente inolvidabel pa mi. Danki, masha danki!"

Miles di famia a disfruta di un dia electrico na ELMAR Open Dag 2024

ELMAR a organisa un bes mas su Open Dag riba dia-domingo 20 di october; un evento cu a uni miles di famia, cliente, estudiante, y e comunidad general pa un dia yen di informacion, demostracion, y diversion.

Bou di e tema "Un Dia Electrico," e evento a duna e bishitante un oportunidad unico pa experencia di cerca e mundo fascinante di coriente. Un highlight di e evento tabata e demostracionnan en bibo di electricidad di e Team di Underground cables (miho conoci como Kabelafdeling) y Grid Quality Management.

Pa famianan, e atraccion di weganan electrico crea pa ELMAR mes tabata un gran hit. E muchanan a disfruta mientras cu a interactua cu e caracter di ELMAN, ELECTROMAR, y otro weganan cu a presenta e concepto di energia den un manera fun y educativo. Pa celebra e 200



aña di e number Oranjestad presenta pa artista Steve Francees, ELMAR a tene tambe un exposicion cu ta muestra e historia y impacto di ELMAR su presencia den e capital di Aruba. E Departamento di DTI, instaladonan reconoci pa DTI,

y e Team di Inspeccion di ELMAR tabata presente pa duna informacion tocante seguridad y inspeccion di coriente, y tabata tin un gran interes den energia solar y instalacion di panel solar. Mientras cu e booth di vehiculo electrico (EV) – presenta pa Ga-

rage Centraal, All To Car, y Activated Power – a permiti cu bishitantenan por explora y test e EV-nan. E Team di ELMAR EV ChargeUp a duna informacion tocante ELMAR su network di stations di chargers di EV rond di nos isla. E Meter & Connection Team di ELMAR a presenta un cas cu tur e aparatonan comun pa muestra cual aparato ta uza e mas coriente y pa promove consumo consciente; e bishitantenan a keda sorprende cu e resultadonan. E Team di Troubleshooting (miho conoci como Storingsdienst) a informa e clientenan con nan mes por detecta un storing cu ta debi na un fayo dentro di e instalacion di coriente di e cas—informacion hopi valioso.

Un atraccion popular tabata e oportunidad pa subi den e bucket di un truck tecnico y goza di e bista na halto, duna e participante un perspectiva unico den e trabou di e line-

men di ELMAR den e Team di Overhead Services. Alabes, e lineman rodeo y competencia di 'speed climbing'. E booth di Customer Service, e smart grid di IT, y e booth di Team di (grid) Planning tabata tambe presente pa duna informacion esencial. Ademas, durante e evento, ELMAR a regala premionan di gift cards di coriente na e bishitantenan.

Danki na e F&B station cu EPI tabata encarga cune, nan a logra colecta e fondonan necesario pa nan bishita di estudio. Open Dag tabata un exito total! E tabata un dia di educacion, diversion, y union. Gerencia di ELMAR ta gradici di curason tur esnan cu a bishita, y henter e team di ELMAR cu a contribui pa haci e evento asina memorabel. Keda pendiente pa e Open Dag 2025, cu lo tuma lugar den cuadro di e celebracion di 75 aña di ELMAR – un evento cu bo no lo kier perde!